

Mga Ehemplo sa Banggiitan nga mga Magtutudlo

PRESIDENTE THOMAS S. MONSON
First Counselor sa First Presidency



Nadungog nato gikan sa ubang banggiitan nga mga magtutudlo sa Simbahan, nga nakahatag og talagsaong pasabut sa daghang mga elemento ug mga baruganan sa maayong pagtudlo.

Sa nahisgutan, kitang tanan mga magtutudlo makaingon kita, ug duna kitay katungdanan sa pagtudlo sa labing maayo nga atong mahimo.

Akong ipaambit kaninyo ang pipila ka mga ehemplo sa mga indibidwal nga akong nailhan nga nakatandog sa akong kinabuhi ug nakatudlo kanako og importante ug dili makalimtan nga mga leksyon.

Ang Matag Usa Adunay Sugilanon

Naghunahuna ako sa usa sa atong emeritus General Authority, si Elder Marion D. Hanks, kinsa milampos sa pagtudlo sa seminary, institute, ug sa Simbahan. Migamit siya og daghang lain-laing mga paagi sa pagtudlo.

Sa usa ka okasyon, si Elder Hanks mibisita sa misyon, nanginterbyu sa mga misyonaryo nga nagtrabaho niana nga dapit. Ako adunay buluhaton duol didto ug nakasakay padulong sa airport uban ni Elder Hanks ug sa presidente sa misyon.

Si Elder Hanks misulti sa presidente sa misyon nga dako nga kahigayunan niya ang pagbisita ug pag-interbyu sa kada misyonaryo. Miingon siya nga siya naaghat sa pagpangutana sa usa ka sister nga misyonaryo, “Palihug sultihi ako mahitungod sa imong misyon ug sa unsay imong gibati nga natawag isip usa ka sister nga misyonaryo.”

Iyang gisultihan siya nga ang iyang amahan, usa ka mag-uuma, andam nga mosakripisyo alang sa Ginoo ug sa Iyang gingharian. Nagsuporta na siya og duha ka anak nga lalaki sa misyon sa dihang siya nakigsulti kaniya mahitungod sa iyang wala ikasulti nga tinguha nga mahimong usa ka misyonaryo ug mipasabut kaniya nga ang Ginoo mitabang kaniya nga maandam sa pagtabang kaniya. Miadto siya sa

uma aron makigsulti sa Ginoo, aron pagsulti kaniya nga siya wala nay materyal nga kabtangan nga ikabaligya o ikasakripisyo o ika-kolateral sa pagpanghulam.

Gusto siyang makahibalo unsaon niya sa pagtabang ang iyang anak nga babaye nga makaadto sa misyon. Iyang gibati ang inspirasyon nga motanom og sibuyas. Sa iyang pagtuo nasayop siya. Ang sibuyas dili maayog tubo niini nga klima, ang uban wala mananom og mga sibuyas, siya walay kasinatian sa pagpananom og mga sibuyas.

Human mag-ampo sa Ginoo, mibati gihapon siya nga mananom og sibuyas. Mao nga nanghulam siya og kwarta gikan sa bangko, mipalit og mga liso, mitanom ug miamuma ug nag-ampo.

Ang panahon nausab, ang sibuyas milambo. Iyang gibaligya ang tanom, nabayran ang iyang utang sa bangko, sa gobyerno ug sa Ginoo, ug ang nahibilin gideposito sa bangko sa pangalan sa iyang anak nga babaye—igo nga makasuporta sa iyang misyon.

Gisultihan dayon ni Elder Hanks ang presidente sa misyon, “Dili nako malimtan ang istorya o ang higayon o ang mga luha sa iyang mga mata o sa

Sa imong pagbasa sa mga kasinatian sa pakigpulong ni Presidente Monson, unsa nga mga impresyon ang miabot kanimo kabahin sa pagkat-on ug pagtudlo? Unsa nga mga kasinatian ang nasugatan nimo isip usa ka magtutuon o isip usa ka magtutudlo nga susama sa mga ehemplo dinhi niini nga mga istorya?

Sa unsang paagi ang kada kasinatian nga giistorya ni Presidente Monson naglarawan sa mga hiyas sa pagtudlo sa Manluluwas? Pag-ampo ug pamalandong kon unsay imong mahimo aron makasunod sa ehemplo sa Manluluwas.





Ang puti nga sobre diin gibutang ang atong bililhon nga pundo alang sa party gipasa gikan sa malumong kamot sa among magtutudlo ngadto sa nagkinahanglan nga kamot sa usa ka masub-anon nga amahan.

iyang tingog o ang mga pagbati nga akong gibati sa iyang pagsulti, ‘Brother Hanks, ako walay pagduhaduha sa pagtuo sa mahigugmaong Langitnong Amahan kinsa nakahibalo sa akong mga panginahanglan ug motabang kanako sumala sa Iyang kaalam kon ako magmapainubsanon kaayo.’

Si Elder Hanks nagtudlo og importante kaayo nga leksyon: ang matag bata sa klase, ang matag batan-ong lalaki ug babaye, ang estudyante sa seminary o institute, ang matag hamtong sa mga klase sa Gospel Doctrine, ang matag misionaryo—oo, ang matag usa kanato—adunay istorya nga ikaistorya. Ang pagpaminaw importanting elemento samtang kita motudllo ug magkat-on.

“Mas Bulahan ang Mohatag Kaysa Modawat”

Nakasinati ako sa akong pagkagamayng bata nga ubos sa impluwensya sa labing epektibo ug dinasig nga magtutudlo, nga naminaw kanamo ug nahigugma kanamo. Ang iyang ngalan mao si Lucy Gertsch.

Sa among klase sa Sunday School,

mitudlo siya kanamo sa Paglalang sa kalibutan, ang pagkapukan ni Adan, sa maulaong sakripisyo ni Jesus. Iyang gidala sa iyang klasehanan isip mga pinasidunggang mga dinapit sila si Moises, Josue, Pedro, Tomas, Pablo, ug gani si Kristo. Bisan og wala namo sila makita, among nakat-unan ang paghigugma, ang pagtahud, ug ang pagsunod kanila.

Walay ingon ka gamhanang pagtudlo ni kamahinuklugon ang iyang pagtudlo kay niadtong Dominggo sa buntag nga subo niyang gipahibalo kanamo ang pagkamatay sa inahan sa kauban sa among klase. Wala namo makita si Billy nianang buntaga apan wala kami makahibalo sa iyang pagpalta.

Ang leksyon naghigot kabahin sa, “Mas bulahan ang mohatag kay sa modawat” (Mga Buhat 20:35). Tungatunga sa leksyon, ang among magtutudlo misira sa manwal ug mibuka sa among mga mata ug mga dunggan ug sa among mga kasingkasing alang sa himaya sa Dios. Nangutana siya, “Pilay kwarta sa atong klase para sa party?”

Sa kalisud kay depresyon kadto

mapagarbuhon kaming mitubag: “Upat ka dolyar ug setenta’y singko sentabos.”

Dayon malumo siyang misugyot: “Ang pamilya ni Billy naglisud ug nagbangutan. Unsay inyong hunahuna kon atong bisitahan ang mga sakop sa pamilya karong buntaga ug ihatag kanila ang inyong pundo?”

Mahinumduman gayud nako ang gamay nga grupo nga naglakaw sa tulo ka *block* sa siyudad, misulod sa balay ni Billy, mitimbaya kaniya, sa iyang mga igsoon, ug amahan. Makita nga wala ang iyang inahan. Gihandom gayud nako pag-ayo ang mga luha nga naglugmaw sa mga mata sa tanan samtang ang puti nga sobre nga gisudlan sa among kwarta sa party nga gitunol sa lumoy nga kamot sa akong magtutudlo ngadto sa nanginahanglang kamot sa usa ka masub-anon nga amahan.

Mibalik dayon kami ngadto sa simbahan. Ang among mga kasingkasing mas maya, mas puno sa kalipay, ang among pagsabut mas tulukibon. Ang dinasig sa Dios nga magtutudlo nakatudlo sa mga batang lalaki ug babaye og mahangtulong leksyon sa balaa-nong nga kamatuoran: “Mas maayo ang mohatag kay sa modawat.”

Mahimong atong litokon ang mga pulong sa mga disipulo sa ilang panaw

sa Emmaus: “Dili ba ang atong mga kasingkasing nagdilaab man sa sulod nato . . . samtang nagsaysay siya kana to sa kasulatan?” (Lucas 24:32).

Si Lucy Gertsch nakaila sa iyang mga estudyante. Dili gayud siya mapakyas sa pagtawag niadtong wala diha sa Dominggo o wala lang moanha. Nasayud kami nga gimahal niya kami. Walay usa kanamo nga nakalimot kaniya o sa mga leksyon nga iyang gitudlo.

Daghang mga tuig na ang milabay, sa dihang si Lucy hapit na mamatay, ako mibisita kaniya. Among gihisgutan kadtong dugay nang mga adlaw nga siya ang among magtutudlo. Among gihisgutan ang matag miyembro sa among klase ug naghigot kon unsa nay gibuhay sa usag usa karon. Ang iyang gugma ug pagpangga milungtad sa tibuok kinabuhi.

Ang mga Artikulo sa Hugot nga Pagtuo

Laing madasigong magtutudlo sa akong kinabuhi mao si Emma Bollwinkel, usa ka sakop sa among Primary board sa stake. Kanunay niya gipasabut ang pagkat-on sa Mga Artikulo sa Hugot nga Pagtuo. Gani, dili kami makagradwar sa Primary hangtud malampuson kaming makarecite sa matag artikulo sa hugot nga pagtuo ngadto kaniya—usa ka hagit sa badlongon nga batang lalaki, apan kami nakalahutay ug milampos. Ako—sa tibuok kinabuhi—isip resulta, nakahimo sa pag-recite sa Mga Artikulo sa Hugot nga Pagtuo.

Sa daghang mga tuig isip usa ka miyembro sa Korum sa Napulog Duha ka mga Apostoles, mga responsibilidad ako sa East Germany, nailhan usab nga German Democratic Republic. Niini nga buluhaton, ang akong kahibalo sa Mga Artikulo sa Hugot nga Pagtuo nakatabang pagayo. Sa akong kada bisita sulod sa 20

ka tuig nga ako nagdumala sa erya, kanunay nakong gipahinumduman ang mga miyembro niadtong dapita sa ika-dose nga artikulo sa hugot nga pagtuo: “Kami nagtuo sa kamandoan ubos sa mga hari, mga presidente, mga magmamando, ug mga maghuhukom sa pagsunod, pagtahud, ug paghupot sa balaod.”

Ang among mga miting luyo sa unsay nailhan nga Puthaw nga Kurtina kanunay nga gibantayan sa gobyerno sa komunista didto. Sa sayo sa 1980, sa dihang nangayo kami og pagtugot gikan sa mga opisyal sa gobyerno aron magtukod og templo didto, ug dayon mihangyo kami alang sa batanong mga lalaki ug mga babaye gikan nianang dapita aron moserbisyo og misyon sa tibuok kalibutan ug sa uban pang mosulod sa ilang nasud aron moserbisyo og mga misyon, sila naminaw ug dayon miingon, “Elder Monson, nagbantay kami kanimo sulod sa 20 ka tuig, ug among nahibaloan nga kami makasalig kanimo ug sa imong Simbahan tungod kay ikaw ug ang inyong Simbahan motudlo sa inyong mga miyembro sa pagsunod sa mga balaod sa yuta.”

Mopaambit ako og laing ehemplo sa kabilihon sa pagkat-on sa Mga Artikulo sa Hugot nga Pagtuo.

Kwarenta ka tuig na ang milabay nagtrabaho ako sa tawo nga ginganlan og Sharman Hummel sa imprintahanan sa Siyudad sa Salt Lake. Gipasakay nako siya makausa gikan sa trabaho ug nangutana kaniya giunsa niya pagangkon ang iyang pagpamatuod sa ebanghelyo.

Mitubag siya, “Makapaikag kaayo, Tom, nga nangutana ka kanako niana, kay karong semanaha ang akong asawa, akong mga anak, ug ako moadto sa Manti Templo, didto pagabugkuson hangtud sa kahangturan.”

Gipadayon niya ang iyang istorya:

“nagpuyo kami sa Silangan. Nagsakay ako og bus padulong sa San Francisco aron magtukod og bag-ong kompaniya sa imprintahanan, ug dayon akong ihatud ang akong asawa ug mga anak. Gikan sa siyudad sa New York ngadto sa Siyudad sa Salt Lake ang biyahe sa bus malinawon. Apan sa Siyudad sa Salt Lake usa ka gamay nga bata misakay sa bus—usa ka Primary nga bata—nga milingkod tupad kanako. Moadto siya sa Reno, Nevada, aron mobisita sa iyang iyaan.

Samtang nagbiyahe kami, nakakita ko sa karatula: ‘Bisita Kamo sa Mormon nga Sunday School karong semanaha.’

“Miingon ako ngadto sa gamay nga batang babaye, ‘Tingali adunay daghang mga Mormon sa Utah, di ba?’

“Mitubag siya, ‘Oo, sir.’

“Dayon giingnan nako siya, ‘Mormon ka ba?’

“Ang iyang tubag mao: ‘Oo, sir.’ ”

Si Sharman Hummell nangutana, “Unsay gituohan sa mga Mormon?”

Ug ang gamayng batang babaye mi-recite sa unang artikulo sa hugot nga pagtuo; dayon gihisgutan kini. Mipadayon, iyang gihatag ang ikaduha nga artikulo sa hugot nga pagtuo ug mihisgot bahin niini. Dayon iyang gihatag ang ikatulo, ug ang ikaupat, ug ang ikalima ug ang ikaunom ug ang tanang Mga Artikulo sa Hugot nga Pagtuo ug naghigot niining tanan. Nakahibalo siya niini nga sunod-sunod.

Si Sharman Hummel miingon, “Sa among pag-abut sa Reno, ug among gipakanaog ang gamay nga babaye ngadto sa iyang iyaan, nadani kaayo ako.”

Siya miingon, “Hangtud ngadto sa San Francisco ako naghunahuna, ‘Unsay nakaaghat nianang gamay nga bata nga makahibalo pag-ayo sa iyang doktrina?’ Sa dihang miabut ako sa San Francisco, ang unang butang nga akong gibuhay,” miingon si Sharman, “mao ang pagpangita diha sa yellow

pages Ang Simbahan ni Jesukristo sa mga Santos sa Ulahing mga Adlaw. Akong gitawag ang presidente sa misyon, ug mipadala siya og duha ka mga misyonaryo sa akong gipuyan. Nahimo akong miyembro sa Simbahan, ang akong asawa nahimong miyembro; ang among tanang anak nahimong miyembro, tungod sa usa ka Primary nga batang babaye nga nakahibalo sa iyang Mga Artikulo sa Hugot nga Pagtuo.”

Naghunahuna ako sa mga pulong ni Apostol Pablo: “Kay wala ko ikaulaw ang ebanghelyo ni Jesukristo, kay kini mao ang gahum sa Dios alang sa kaluwasan” (Mga Taga-Roma 1:16).

Paglabay sa tulo ka tuig, ang pamilyang Hummel miadto sa Siyudad alang sa kasal sa ilang anak nga babaye, nga si Marianne. Mihapit sila sa opisina; nindot ang among panag-istoryahanay. Ang tanang 6 ka mga anak nga babaye, uban sa 4 ka umagad nga lalaki, ug 12 ka mga apo. Ang tibuok pamilya nagpabilin nga aktibo sa Simbahan.

Ang matag anak nga mga babaye nakaadto sa templo. Dili maihap ang mga natudloan sa kahibalo sa ebanghelyo sa mga miyembro niini nga pamilya—tungod sa usa ka gamay nga bata nga natudloan sa mga Artikulo sa Hugot nga Pagtuo ug may abilidad ug kaisug sa pagpahayag sa kamatuoran ngadto sa tawo nga nangita sa kaha-yag sa ebanghelyo.

“Pag-andam Gayud Kanunay”

Ganahan ako sa mando sa Ginoo sa ika-88 nga seksyon sa Doktrina ug mga Pakigsaad: “Ako mohatag kaninyo og sugo nga kamo motudlo sa usag usa sa doktrina sa gingharian. Pagtudlo kamo nga makugihon ug ang akong grasya motabang kaninyo” (D&P 88:77–78).

Daghang mga tuig na ang milabay, nagsakay ako og eroplano alang sa usa

ka buluhaton sa southern California, usa ka matahum nga batan-ong babaye milingkod tupad kanako. Nagsugod siya sa pagbasa og libro. Sa akong kasibot, gipasiplatan nako ang ulohan: *A Marvelous Work and a Wonder*.

Miingon ako kaniya, “O, usa ka gayud ka Mormon.”

Mitubag siya, “Oh, dili. Nganong nangutana man ka?”

Mitubag ko, Ahh, nagbasa ka og libro nga gisulat sa usa ka inila kaayo nga miyembro sa Ang Simbahan ni Jesukristo sa mga Santos sa Ulahing mga Adlaw.”

Miingon siya, “Mao ba? Usa ka higala mihatag niini kanako, apan gamay ra ang akong nahibaloan niini. Hinoon, nakapaikag kini kanako.”

Dayon ako naghunahuna, “Mopadayon ba ako ug mosulti og dugang mahitungod sa Simbahan?” Ug ang mga pulong ni Apostol Pedro miabut sa hunahuna: “Kinahanglan nga andam kamo kanunay sa pagtubag ni bisan kinsa nga mangutana sa hinungdan sa paglaum nga anaa kaninyo” (1 Peter 3:15). Nakahukom ako nga kini ang panahon nga ako mopamatuod.

Giingnan nako siya nga kahigayunan nako ang pagtabang ni Elder Richards sa pagpaimprinta sa *A Marvelous Work and a Wonder*. Gisultihan nako siya mahitungod niadtong bantugan nga tawo. Gisuginlan nako siya sa liboan ka mga tawo nga midawat sa kamatuoran human moba-sa nianang iyang gibuhat.

Dayon nakahigayon ako, hangtud sa Los Angeles, sa pagtubag sa iyang mga pangutana kalabut sa Simbahan—maalamong mga pangutana nagagikan sa kasingkasing nga nagpangita sa kamatuoran. Nangutana ko kon mahimo ba nga mopahigayon nga tawagon siya sa duha ka sister nga mga misyonaryo. Nangutana ko kon gusto ba

siya nga motambong sa atong branch sa San Francisco, diin siya magpuyo. Ang iyang mga tubag positibo.

Pag-abut sa amo misulat ko kang Presidente Irven G. Derrick sa San Francisco stake ug mihatag ngadto kaniya sa impormasyon. Makahanduraw ba kamo sa akong kalipay, paglabay sa pipila ka bulan, nakadawat ko og tawag gikan ni Presidente Derrick diin siya miingon, “Elder Monson, mitawag ako kanimo bahin ni Yvonne Ramirez, ang off-duty nga flight attendant, usa ka batan-ong babaye nga milingkod tupad kanimo ngadto sa Los Angeles, usa ka batan-ong babaye nga imong giingon nga dili sulagma nga nakalingkod tupad kaniya ug nga siya nagbasa sa *A Marvelous Work and a Wonder* niana nga biyaha. Brother Monson, bag-ohay lang siyang nahimong pinakabag-o nga miyembro sa Ang Simbahan ni Jesukristo sa mga Santos sa Ulahing mga Adlaw. Gusto siyang makigsulti kanimo ug mohatag sa iyang pasalamat.” Oo nalipay ako pag-ayo. Talagsaon kadto nga tawag.

Ehemplo ni Presidente McKay

Usa ka ehemplo sa bantugan magtudlo mao si Presidente David O. McKay, kinsa mitawag kanako nga mahimong usa ka miyembro sa Korum sa Napulog Duha ka mga Apostoles. Motudlo siya uban ang gugma ug pagkasensitibo. Siya ang labing importante nga ehemplo og unsay iyang gitudlo. Ang iyang kasingkasing mabination, ang iyang pamatasan maabiabihon. Magtudlo siya sa kamatuoran sunod sa sumbanaan sa Manluluwas.

Nakaobserbar ako niini nga kinaiya, dugay na sa wala pa ako mahimong General Authority, mosulod ako sa iyang opisina aron sa pagribyu sa pruwera sa mga giimprinta sa libro



Ang panihapon sa Dominggo kanunay gayud nga morag mas lami human ako mibalik gikan sa akong buluhaton.

nga among giimprinta. Niana nga okasyon, nakamatikod ako og litrato sa bong-bong, ug ako miingon ngadto kaniya, “Presidente McKay, nindot kana nga litrato. Usa ba kana ka painting sa panimalay sa imong pagkabata didto sa Huntsville, Utah?”

Misandig siya sa iyang lingkuranan ug mikatawa sa sinating kinatawanan ni David O. McKay ug miingon, “Sultihan ko ikaw niana nga litrato. Usa ka matahum nga babaye miabut aron makigkita kanako nianang adlaw ug mihatag kanako nianang matahum nga painting, gikwadro ug andam nga ibutang sa bong-bong, miingon siya, ‘Presidente McKay, gigahin nako and tibuok summer pagpintal niini nga litrato sa panimalay sa imong katigulangan.’ ”

Miingon siya nga iyang gidawat ang gasa ug mipasalamat kaniya pag-ayo.

Ug miingon siya kanako, “Nakahibalo ka Brother Monson, kadtong mahal nga babaye mipintal sa sayop nga balay. Iyang gipintal ang balay nga tupad sa among balay! Ako walay kaisug sa pagsulti kaniya nga ang iyang napintal ang sayop nga balay.”

Apan mihimo siya niini nga komentaryo—ug ania ang importante nga leksyon alang kanatong tanan.

Miingon siya, “Sa tinuod, Brother Monson, iyang napintal ang sakto nga balay alang kanako, tungod kay isip usa ka batang lalaki, mohigda ako diha sa atubangan nga kayda sa balay sa akong katigulangan, ang talan-awon agi nianang *gi-screen* nga kayda mao ang balay nga iyang gipintal. Napintal gayud niya ang angay nga balay alang kanako!”

Mga Leksyon kabahin sa Pagserbisyo sa Uban

Ang ubang pinaka nindot nga mga leksyon sa kinabuhi nagagikan sa atong mga ginikanan. Ang akong mga ginikanan nagtudlo kanako og bililhong mga leksyon samtang ako nagtubo. Kanunay kadtong mga leksyon may kalabutan sa pagserbisyo sa uban. Daghan kaayo ang akong mga handumanan sa mga adlaw sa akong pagkabata. Ang pagpaabut sa panihapon sa Dominggo maoy usa niini.

Samtang kaming mga bata gutom na kaayo ug naghinam-hinam nga

nanglingkod sa lamesa, ang kahumot sa inasal nga baka mipuno sa kwarto, si Mama moingon kanako, “Tommy, sa dili pa kita mangaon, dad-a kining pagkaon nga akong giandam ngadto kang Old Bob, ug balik dayon.”

Wala gayud ako makasabut nang-nong dili lang una kami mangaon ug pagkahuman ihatud ang pagkaon. Wala gayud ako magbagulbol apan modagan ngadto sa iyang balay ug maghulat ni Old Bob nga moabli sa pultahan. Dayon akong itunol ang plato sa pagkaon. Iyang ihatag kanako ang limpyo nga plato gikan sa miaging Dominggo ug mohatag kanako og usa ka 10 cents isip bayad sa akong serbisyo.

Ang akong tubag kanunay: “Dili ako modawat sa kwarta. Bunalan ako sa akong mama.”

Dayon iyang ihapuhap ang iyang nangunot nga kamot sa akong buwagaw nga buhok ug moingon, “Akong bata, ikaw adunay buotan nga inahan. Sultihni siya nga salamat.”

Makahinumdom gayud ako niadtong panihapon sa Dominggo nga kanunayng mobati og kanindot human nako matuman ang gisugo.

Ang amahan sa akong inahan, si Lolo Thomas Condie, mitudlo usab kanako og gamhanan nga leksyon nga



Mikuot si lolo sa iyang balsa ug mikuha og usa ka yawe ug gihatag kini ngadto kang Old Bob.

kabahin gihapon ni Old Bob, nga miabut sa among kinabuhi sa talagsaong paagi.

Usa siya ka biyudo nga anaa sa ika-80 niya nga pangidaron sa dihang ang balay diin siya nag-abang og kwarto giguba. Nakadungog ako sa iyang pagsulti sa akong lolo sa iyang gidangatan samtang kaming tulo naglingkod sa karaan nga duyan atubangan sa akong lolo. Sa subo nga tingog, miingon siya ngadto ni Lolo, “Mr. Condie, wala ako makahibalo unsay buhaton. Ako walay pamilya. Ako walay kaadtoan, gamay ra ang akong kwarta.” Naghunahuna kog unsaon pagtubag ni Lolo.

Kami padayon nga nagduyan-duyan. Unya mikuot si Lolo sa iyang balsa ug gikuha ang karaan nga pitaka nga panit, diin agig tubag sa akong pag-awhag, siya mipagawa og daghang kwarta alang sa usa ka espesyal nga okasyon. Niining higayona iyang gikuha ang yawe ug gitunol ngadto kang Old Bob.

Malumo siya nga miingon, “Bob, ania ang yawe niana nga balay nga akong gipanag-iya. Dawata kini. Ibalhin ang imong mga butang. Puyo hangtud kanus-a ikaw gusto. Walay abangan nga pagabayran ug wala nay makapapahawa kanimo diha.”

Nanglugmaw ang mga luha ni Old

Bob, mitulo sa iyang mga aping unya nawala sa iyang tag-as, puti nga bungot. Ang mga mata ni Lolo nagluha usab. Ako walay tingog, apan niadtong adlaw ang akong apohan ingon sa napulo ka tiil ang gitason. Mapagarbuhon ako nga nagdala sa iyang apelyido. Bisan og ako usa ka bata, kadto nga leksyon adunay gamhanang impluwensya sa akong kinabuhi.

Mao kini ang pipila ka mga leksyon nga akong nakat-uan gikan niadtong nakatandog sa akong kinabuhi ug nakatudlo kanako.

Usbon ko, akong sublion nga kitang

tanang mga magtutudlo. Kinahanglang mahinumdom kita nga kita dili lamang mga pulong ang itudlo, motudlo usab kita kon kinsa kita ug giunsa nato pagpuyo sa atong kinabuhi.

Ang Hingpit nga Ehempro

Samtang kita motudlo sa uban, hinaut nga atong sundon ang ehempro sa perpekto nga magtutudlo, ang atong Ginoo ug Manluluwas nga si Jesukristo. Iyang gibilin ang Iyang mga tunob diha sa balas sa baybayon, apan mibilin sa Iyang mga baruganan sa pagtudlo diha sa mga kasingkasing ug sa mga kinabuhi sa tanang Iyang gitudloan. Iyang gisugo ang Iyang mga disipulo niadtong adlaw—ug ngari kanato Siya namulong sa sama nga mga pulong—“Sunod kamo kanako” (Juan 21:22).

Hinaut nga magpadayon kita nga may espiritu sa pagkamasulundon, aron ikasulti sa matag usa kanato sama nga kini gipamulong sa Manunubos, “Ikaw magtutudlo gikan sa Dios” (John 3:2). Hinaut nga kini mao unta, ako nag-ampo, sa pangalan ni Jesukristo, amen. ■

